

Aestate lutum quod stagna exsiccentur, olent. Septembri, quod luto putrescente pinguiore evadant, insalubres sunt. Optimi qui circa Abderam, deinde qui circa Sinopem capiuntur. Romae maxima ovorum gratia, quae teste Jovio, geminis folliculis circumcisa parte feminis, recentibus Cephalis eximuntur, et nomen ὀνταρίχων, ovorum salitorum apud Graecos obtinere. Quantum

ad Medicinam, Ventriculus Mugilum, seu in cinerem redactus, seu in fumo siccatus, et vel vino albo, vel aqua absynthii ablutus, et in cibo sumptus, ventriculi exsoluti vires non minus quam ventriculi gallinarum potus interna reficit. Elixus in vino et ex aceto sumptus vomitum compescit, prodente omnia Rondeletio. Lapilli in cerebro contra Nephritim valent.

CAPVT V.

De Capitone Anadromo Gesneri.

TAB. XXIII.
6.
Aldrovand.
de Piscibus
l. 4. c. 7.

Capitonem Anadromum, *Gesnerus* et *Kentmannus* descripsere. Natus, inquit, ille, videtur, prominente et carnosâ superiore oris parte, ut in nostris fluminibus, is quem Nafi nomine descripsimus: cui etiam reliqua corporis specie per omnia adeo similis est, ut discrimen nullum animadvertam, ne colorum quidem fere, nisi quod Albinus hic Nafus magis albicat, noster fluviatilis, vero magis fuscus est. Sed noster plane fluviatilis est, Albinus e mari ascendit: praeterea noster vilis et plebejus est, Albinus vero inter laudatos, praefertim assus. Hoc etiam notandum, cum Albinus alio nomine *Blicca* dicatur, longe alium piscem eodem nomine a nostris vocari, de quo egimus inter albos pisces. Miseni etiam Zertam dicunt, quod nomen etiam Polonis usitatum audio. *Zerta* inquit *Kentmannus*, piscis longiusculus, argentei nitoris, squammis parvis tegitur, dorso subfusco: pinnis quae ad branchias sunt et parte supina rutilis, paucis caeruleo admixto. Linea utrinque a branchiis ad caudam tendit, in qua puncta fusci coloris digeruntur. Caput crassiusculum, oculi pulchri, magni, albicantes, nares magnae non procul ab ore. Os molle prorsus, in quo nec dentes sunt, nec alia asperitas, sed ab initio gulae seu faucium, maxilla utrimque valida, dentibus fenis oblongis valata. Maximi hujus generis pisces qui apud Misenos capiuntur, bilibres

sunt. Libram XVI. unciarum dico. Anno toto ex Oceano in Albim ascendit hic piscis, maxime vero circa Pentecostem, qui tempore parit, migrare solet, tunc etiam ad cibum praefertur, quod foeminae ovis plenae sunt. Manent et pariunt in Albi, proficiuntque ipsi et soboles: augentur enim et pinguescunt. Vescitur omne genus pisciculis, qui nullis praefertim spinis et aculeis rigent: item muscis aliisque insectis, quibus intra aut proxime supra aquam potitur. Habetur inter optimos qui in Albi sunt, assari solitos pisces. Caro enim ejus optimi saporis est. Rite etiam elixus non male sapit. Desquamatus nempe, exenteratus et elutus, in aquam fervere incipientem immittitur, conditusque ac salitus ad juris fere consumptionem coquitur, quo modo permulti etiam alii fluviatiles pisces elixari solent. Sunt qui juri haud fere consumpto copiosum butyrum addunt, eoque liquato piscem inferunt. Potest et aceti aliquid affundi, et Zinziber aspergi, pro cuiusque palato. Assus vel simpliciter, vel cum embammate e caepis minutatim concisis, vino, croco, saccharo et zinzibere, sapidissime estur. Nec displicuerit desquamatus, in frustra concisus, quae in polenta aut secalis pollinevolvuntur, atque ita in butyro sive crudo sive liquato frixus. Haec omnia *Kentmannus*. Addit *Gesnerus* non in Albi tantum, sed Sala etiam apud Misenos flumine Zertam capi.